



Lets in Ostarie:

SCÛR DI LUNE

di Checo Tam

CE LIBRI ISAL?

Un librut - di chei picinins che o vin za vût fevelât - de golaine de Kappa vu La Comugne, fat dut di contis e scrit di Checo tam tal 2008, cun 115 pagjinis, e cuasit une cuarentine di contis.

MA CUI ISAL L'AUTÔR?

Checo al è il famei de cheste Ostarie, prin di dut, e il plui grant, par cuantitât, costance e cualitât, fornidôr di contis di Contecurte. 'nt cjatais une sglavinade, **te pagjine dai contecurtârs**, cuasi simpri curtissimis, cuasi simpri cun venaduris fantasientifichis e sureâl. Cun di plui al è la vôs fisse dal ostîr intai events dulà che al è di lei par furlan. No content, al è il cjantant - Francis - dai **Francis and the phantoms**, autôr di altris libris, sunadôr di sax, e di agnorums, vôs dal **program radiofonic Indigo**, su radio onde furlane, al sabide di sere aes 9 sot sere.

MA CE ISAL DENTRI, DI PRECÎS?

Contis! Une vore di contis, cualchidune che no jemple une pagjine, cualchidune dôs o tre. A àn in tantis un leam cu la fantasience, soledut chê dai B-movie merecans, ma di spes la

fantasiencie e je dome un pretest par contâ dai paîs di chenti, a tacâ di Pavie di Udin, o de int furlane e dal Friûl, cun ricuarts che a van indaûr tal timp restant precîs e inmagents. In tal contâ no si tire indaûr la man in fat di origjinalitât, difat, si cjate dispes il naradôr che si rivolç dret al letôr, si cjata AE tal puest de e, si cjate siums, musiche, ma ancje contis gjenuinis e poetichis, dongje di sei cuasi poesiis o cjançons. Insome... al è une vore dificil definîlu, pe sô trasversalitât.

MA A CUI I PUEDIAL PLASÊ?

A chei che son stufs di contis normâls e a àn gust di misturâ gjenars leteraris e di fâlu in struc. A chei che no abadin tant al scrivi in maniere didatiche, ma lu sorpassin a man drete, cu la fantasie. A ducj chei che a àn voie di provâ a lei cualchi conte di Checo achì su la ostarie e la cjatin biele, di vê voie di leint une altre. E a chei che ur plâs lei robis stranis, dulà che Selvucis al è tant che un Univiers, e contrari.

E SE O AI VOIE DI CJOILU?

Intes seradis de ostarie, inte cariole dal ostîr, a varessis di cjatâlu, o si no [li di Onde Furlane](#), in via Volturmo, baste sunâ il campanel e fâ lis scjalis cun 10euro, o si no in cualchi librerie di Udin, o [sul sito de kappa vu](#), su [ibs](#), o insome, sgarfant [tal web si cjate](#).